

13.10.2022.

Goražde je po XVIII put domaćin privredno-kulturne manifestacije "Dani jabuke" Goražde 2022. U prisustvu brojnih zvanica ceremonija svečanog otvaranja Sajma održana je danas na platou ispred Gradske dvorane "Mirsad Hurić".



Riječi dobrodošlice zvanicama i učesnicima najprije je uputio predsjednik Upravnog Odbora PKM "Dani jabuke" Mirsad Hubanić. O ulozi i značaju ovog Sajma govorili su brojni zvaničnici među kojima zamjenik predsjednika Privredne komore FBiH, dr. Marko Šantić, potpredsjednik vanjskotrgovinske komore BiH Ahmet Egrić, profesor na PPF Vedad Falan i drugi gosti.



Posebnu dobrodošlicu u naš grad gostima i učesnicima Sajma poželio je gradonačelnik Goražda Ernest Imamović, koji je prilikom obraćanja naglasio da će Grad Goražde u narednom periodu riješiti problem pijace koja je gorući problem naših poljoprivrednika jer nemaju adekvatan prostor gdje mogu da prodaju svoje proizvode.



Čast da zvanično proglasi otvorenom XVIII privredno-kulturnu manifestaciju “Dani jabuke” Goražde 2022. pripala je učeniku OŠ “Fahrudin Fahro Baščelija” Ahmedu Gušu, koji je na svjetskom takmičenju inovatora osvojio prvo mjesto sa izumom kojim se istovremeno detektuje i gasi požar.



Ceremoniju svečanog otvaranja svojim nastupom upotpunila je i Hana Sjerčić.

Na manifestaciji, po kojoj je Goražde postalo prepoznatljivo u cijelom regionu, ove godine svoje proizvode predstaviti će veliki broj izlagača. Svi izložbeni kapaciteti u prostoru dvorane “Mirsad Hurić” su popunjeni, gdje su izloženi proizvodi iz oblasti poljoprivrede, prehrambene industrije i turizma.

U okviru manifestacije koja traje do subote 15.10.2022. organizovaće se okrugli sto o temi “Pravilna ishrana preživara sa akcentom na ishranu muznih krava” predavača Kristofa Seleša, a kako ističe organizator manifestacije i ove godine će biti dodjeljena priznanja za kvalitet proizvoda.



Također organizovaće se i takmičenje škola iz BiH i regiona “Smotaj i probaj slatko” delicije od jabuka, a biće održan još jedan okrugli sto na temu “Pravilnom ishranom i zaštitom do visokog prinosa maline”, gdje će predavači biti mr.sci. Nermin Mašala i mr.sci. Omer Omerbegović.

Ovogodišnja privredno kulturna manifestacija “Dani jabuke” Goražde 2022. održava se pod pokroviteljstvom Ministarstva poljoprivrede, vodoprivrede i šumarstva FBiH, Vlade Bosansko-podrinjskog kantona Goražde, Grada Goražda, Caritas-a, te brojnih sponzora.